

719

Na osnovu člana 11. stav (7) Zakona o obrazovanju odraslih („Službene novine Tuzlanskog kantona“, broj 9/15), Ministarstvo obrazovanja, nauke, kulture i sporta Tuzlanskog kantona d o n o s i

P R A V I L N I K**o postupku utvrđivanja ispunjenosti uslova za rad organizatora obrazovanja odraslih****I. OPĆE ODREDBE****Član 1.****(Predmet pravilnika)**

Ovim pravilnikom propisuje se postupak utvrđivanja ispunjenosti uslova za rad organizatora obrazovanja odraslih, imenovanje komisije, način rada komisije i izdavanje rješenja.

Član 2.**(Postupak utvrđivanja ispunjenosti uslova)**

(1) Postupak utvrđivanja ispunjenosti uslova za rad organizatora obrazovanja odraslih provodi se prije početka rada organizatora odraslih, u slučaju izmjene ili dopune registracije, kao i svake naredne četiri godine.

(2) Postupak utvrđivanja ispunjenosti uslova za rad organizatora obrazovanja odraslih provodi Ministarstvo obrazovanja, nauke, kulture i sporta Tuzlanskog kantona (u daljem tekstu: Ministarstvo).

II. POSTUPAK UTVRĐIVANJA ISPUNJENOSTI USLOVA ZA RAD**Član 3.****(Pokretanje postupka)**

(1) Postupak utvrđivanja ispunjenosti uslova za rad organizatora obrazovanja odraslih pokreće se podnošenjem zahtjeva.

(2) Zahtjev za utvrđivanje ispunjenosti uslova za rad organizatora obrazovanja odraslih podnose organizator obrazovanja odraslih ili njegov osnivač Ministarstvu.

(3) Uz zahtjev prilažu sljedeću dokumentaciju:

- a) osnivački akt,
- b) elaborat o opravdanosti osnivanja,
- c) podatke o licu ovlaštenom za zastupanje,
- d) dokaz o obezbijeđenim uslovima i sredstvima za rad,
- e) dokaz o izvršenoj uplati troškova provođenja postupka utvrđivanja ispunjenosti uslova za rad organizatora obrazovanja odraslih,
- f) rješenje o upisu u sudski registar,
- g) porezni broj.

Član 4.**(Kriteriji)**

Kriteriji na osnovu kojih se utvrđuje ispunjenost uslova za rad organizatora obrazovanja odraslih utvrđeni su Standardima i normativima za obrazovanje odraslih (u daljem tekstu: Standardi i normativi), a odnose se na ljudske, prostorne i materijalno-tehničke resurse.

Član 5.**(Utvrđivanje ispunjenosti uslova)**

(1) Po prijemu zahtjeva za utvrđivanje ispunjenosti uslova za rad organizatora obrazovanja odraslih, Ministarstvo cijeni kompletanost zahtjeva.

(2) Ukoliko dokumentacija dostavljena uz zahtjev nije potpuna, Ministarstvo pismeno obavještava podnosioca zahtjeva o nedostacima uz utvrđeni rok za dopunu ili ispravku zahtjeva.

(3) Rok iz stava (2) ovog člana ne može biti duži od 30 dana.

(4) Ukoliko podnositelj zahtjeva ne otkloni uočene nedostatke u propisanom roku iz stava (3) ovog člana, zahtjev će Ministarstvo odbaciti zaključkom.

(5) Ukoliko zahtjev ispunjava formalne uslove, ispunjenost uslova za rad organizatora obrazovanja odraslih utvrđuje komisija koju imenuje ministar obrazovanja, nauke, kulture i sporta Tuzlanskog kantona (u daljem tekstu: ministar).

Član 6.**(Imenovanje komisije)**

(1) Najkasnije u roku od 10 dana od dana prijema urednog zahtjeva ministar imenuje komisiju koja provodi postupak utvrđivanja ispunjenosti uslova za rad organizatora obrazovanja odraslih.

(2) Komisija iz stava (1) ovog člana ima tri člana, od kojih je jedan predsjednik.

(3) Komisiju čine dva predstavnika Ministarstva i jedan predstavnik Pedagoškog zavoda Tuzlanskog kantona (u daljem tekstu: Pedagoški zavod).

(4) Za pravilnost rada i postupanja komisije odgovoran je predsjednik.

Član 7.**(Kodeks ponašanja)**

Tokom rada svaki član komisije mora biti nepristrasan u odnosu na organizatora obrazovanja odraslih, i da sve informacije sadržane u dokumentaciji koja je predmet razmatranja, neće ni pod kojim uslovima otkrivati bilo kojem licu koje nije zvanično uključeno u postupak utvrđivanja ispunjenosti uslova.

Član 8.**(Način rada komisije)**

(1) Komisija radi u punom sastavu i o svim poduzetim radnjama i uočenom sačinjava zapisnik.

(2) Komisija utvrđuje ispunjenost uslova za rad organizatora obrazovanja odraslih uvidom u dostavljenu dokumentaciju kao i uviđajem na licu mjesta u poslovnim prostorijama organizatora obrazovanja odraslih.

(3) Ako u postupku Komisija utvrdi da postoje određene nepravilnosti i da nisu potpuno ispunjeni propisani uslovi, zapisnikom nalaže podnosiocu zahtjeva da otkloni uočene nepravilnosti i određuje mu rok za to.

(4) Na osnovu konačno utvrđenog stanja Komisija sačinjava zapisnik u kojem predlaže ministru da donese rješenje o ispunjenosti uslova za rad organizatora obrazovanja odraslih ili rješenje o odbijanju zahtjeva.

Član 9.**(Uvid na licu mjesta)**

(1) Prilikom uviđaja na licu mjesta radi utvrđivanja ispunjenosti uslova za rad organizatora obrazovanja odraslih u pogledu prostora, opreme i nastavnih sredstava, te drugih materijalno-tehničkih uslova za rad u skladu sa Standardima i normativima, Komisija je dužna utvrditi za koji maksimalni broj polaznika su ispunjeni propisani uslovi.

(2) Komisija posebno utvrđuje ispunjenost uslova za realizaciju praktične nastave u punom fondu sati kod organizatora obrazovanja odraslih ili kod poslodavca na osnovu ugovora o poslovnoj saradnji.

Član 10.**(Rješenje o ispunjenosti uslova za rad)**

(1) Ministarstvo na osnovu preporuke komisije donosi rješenje kojim se utvrđuje da jesu ili nisu ispunjeni uslovi za rad organizatora obrazovanja odraslih.

(2) Rješenje iz stava (1) ovog člana je konačan upravni akt.

(3) Na osnovu rješenja o ispunjenosti uslova za rad, organizatori obrazovanja odraslih podnose Ministarstvu zahtjev za

upis u Registar organizatora obrazovanja odraslih (u daljem tekstu: Registar)

(4) Organizator obrazovanja odraslih može početi sa radom nakon upisa u Registar.

Član 11. (Stupanje na snagu)

Ovaj pravilnik stupa na snagu danom donošenja, a objavit će se u „Službenim novinama Tuzlanskog kantona“.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
MINISTARSTVO OBRAZOVANJA
NAUKE, KULTURE I SPORTA
Broj: 10/1-38-23389-1/15
Tuzla, 30.10.2015. godine

MINISTAR
Mr.sci. Izet Jagodić, v.r.

720

Na osnovu člana 27a. stav (6) Zakona o visokom obrazovanju („Službene novine Tuzlanskog kantona“, broj 8/08, 11/09, 12/09, 13/12, 16/13, 7/14 i 8/14), Ministarstvo obrazovanja, nauke, kulture i sporta Tuzlanskog kantona, donosi

PRAVILNIK O IZMJENAMA I DOPUNAMA PRAVILNIKA O POSTUPKU LICENCIRANJA STUDIJSKIH PROGRAMA PRVOG, DRUGOG I TREĆEG CIKLUSA STUDIJA VISOKOŠKOLSKIH USTANOVA NA PODRUČJU TUZLANSKOG KANTONA

Član 1.

U članu 6. stav (3) Pravilnika o postupku licenciranja studijskih programa prvog, drugog i trećeg ciklusa studija visokoškolskih ustanova na području Tuzlanskog kantona („Službene novine Tuzlanskog kantona“, br. 7/14 i 10/15) mijenja se i glasi:

„(3) Tri člana komisije imenuju se iz reda stručnjaka iz naučne oblasti iz koje je studijski program predložen, sa Spiska domaćih i međunarodnih stručnjaka za ocjenjivanje i reviziju kvalitete, te davanje preporuka o akreditaciji visokoškolskih ustanova i njihovih studijskih programa utvrđen od strane Agencije za razvoj visokog obrazovanja i osiguranje kvaliteta Bosne i Hercegovine, jedan član je iz reda Ministarstva i jedan član je iz reda stručnjaka odnosno istaknutih predstavnika akademske zajednice iz odgovarajuće naučno-nastavne, odnosno umjetničko-nastavne oblasti iz koje je predložen studijski program“.

Stav (6) mijenja se i glasi:

„(6) Svi članovi komisije imaju pravo na naknadu za rad, u skladu sa odlukom iz člana 13. stav (3) ovog pravilnika.“

Član 2.

U članu 8. stav (1) mijenja se i glasi:

„(1) Predsjednik i članovi komisije iz reda stručnjaka iz naučne oblasti iz koje je studijski program predložen, ne smiju imati sukob interesa sa visokoškolskom ustanovom čiji studijski program se licencira“.

Stav (3) mijenja se i glasi:

„(3) Predsjednik i član komisije iz reda stručnjaka iz naučne oblasti iz koje je studijski program predložen se izjavom obavezuje da u narednih pet godina od dana donošenja rješenja kojim se odobrava izvođenje studijskog programa neće prihvatiti angažman na visokoškolskoj ustanovi za koju je provodio postupak licenciranja studijskog programa“.

Član 3.

Ovaj pravilnik stupa na snagu danom donošenja i objavit će se u Službenim novinama Tuzlanskog kantona.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
MINISTARSTVO OBRAZOVANJA
NAUKE, KULTURE I SPORTA
Broj: 10/1-38-024164/15
Tuzla, 29.10.2015. godine

MINISTAR
Mr.sci. Izet Jagodić, v.r.

721

Na osnovu člana 56. Zakona o organizaciji organa uprave u Federaciji Bosne i Hercegovine (“Službene novine Federacije Bosne i Hercegovine”, broj 35/05) i Poglavlja IV. Programa mjera zdravstvene zaštite životinja na Tuzlanskom kantonu za 2015. godinu, broj: 04/1-24-12368/15 od 18.06.2015. godine, na koji je Vlada Tuzlanskog kantona dala saglasnost Odlukom, broj: 02/1-24-12368-1/15 od 29.06.2015. godine, a u vezi sa članom 124. Zakona o veterinarstvu („Službene novine Federacije Bosne i Hercegovine“, broj 46/00), ministar poljoprivrede, šumarstva i vodoprivrede donosi

ODLUKU

o izmjenama i dopunama Odluke
o sufinansiranju mjera zdravstvene zaštite životinja
na području Tuzlanskog kantona za 2015. godinu

I.

U Odluci o sufinansiranju mjera zdravstvene zaštite životinja na području Tuzlanskog kantona za 2015. godinu, broj: 04/1-24-16368-1/15 od 06.07.2015. godine, u tački II., iza riječi „središte veterinarske organizacije“ briše se zarez, stavlja tačka i brišu riječi: „...te nakon što Kantonalni veterinarski inspektor izvrši kontrolu provedenih mjera.“

II.

U tački IV., u stavu (1) iza riječi „Ministarstvo poljoprivrede, šumarstva i vodoprivrede“ stavlja se zarez i brišu riječi: „u roku od 15 (petnaest) dana od dana izvršene kontrole provedenih mjera, od strane Kantonalnog veterinarskog inspektora“.

U stavu (2) tačka d) briše se.

III.

Iza tačke V dodaju se nove tačke V. a i V. b, koje glase:

„V. a

Inspeksijski nadzor će se vršiti od strane Kantonalnog veterinarskog inspektora, u skladu sa operativnim planom Kantonalne uprave za inspeksijske poslove, nakon provedenih mjera propisanih Uputstvom o provedbi mjera za otklanjanje i sprečavanje zaraznih i parazitarnih bolesti životinja za 2015. godinu („Službene novine Federacije Bosne i Hercegovine“, broj 63/15).

Nakon obavljenog inspeksijskog nadzora iz stava (1) ove tačke, Kantonalni veterinarski inspektor je dužan o istom obavjestiti Ministarstvo poljoprivrede, šumarstva i vodoprivrede, najkasnije do 31.12.2015. godine.

Ministarstvo poljoprivrede, šumarstva i vodoprivrede će, metodom slučajnog uzorka ili vlastitom procjenom, zatražiti vršenje inspeksijskog nadzora.

Kantonalni veterinarski inspektor je dužan, za svaki pojedinačni zahtjev za vršenje inspeksijskog nadzora, dostaviti zapisnik o izvršenom inspeksijskom nadzoru, najkasnije u roku od sedam (7) dana od dana zaprimanja zahtjeva.